

НА ВЕЛИЦЕЙ ВЕЧЕРНИ

На Господи воззвах

Стихиры, глас 1-й:

Подобен: О, дивное чудо:

1. Стих: Из глубины воззвах к Тебе, Господи,/ Господи, услыши глас мой.

2. Стих: Да будут уши Твои/ внимлюще гласу моления моего.

О, преславное чудо,/ подвижник благочестия в Сарове является,/ и молитвенник к Богу тёплый/ Серафим пречудный нам бываёт:/ веселіся, обитель Сарóвская,/ имуще в себе мощи преподóбнаго:/ взыграйте, православных мнóжества,/ предивнаго Серафима имуще в бедах заступника и вопиюще к нему́:/ раду́йся, светильниче Россі́йския землі,/ тьмы сопротивных далéче отрева́й, // и Господеви молися даровати душам нашим мир и велию мѝлость. **Дважды.**

3. Стих: Аще беззакония назриши, Господи, Господи, кто постоит;/ яко у Тебе очищение есть.

4. Стих: Имене ради Твоего потерпех Тя, Господи, потерпе душа моя в слово Твое,/ упова душа моя на Господа.

О, дивное чудо,/ се бо воистину во обители Саровстей/ благочестия столп непоколебимый/ Серафим блаженный является нам./ Темже, богомудрых собори, на высоту духом возноситеся,/ к преподобному вопиюще:/ преподобне отче Серафиме,/ Господеви молися/ даровати душам нашим// мир и велию милость. **Дважды.**

5. Стих: От стражи утренняя до ночи, от стражи утренняя, / да уповаает Израиль на Господа.

Дивны Твои тайны, / Христе Боже, / яко даровал еси нам светильника, / преподобнаго Серафима, / иноком и всем православным христианом молитвенника, / святей обители похвалу и утверждение: / молися, преподобне, Господеви, / даровати душам нашим // мир и велию милость.

6. Стих: Яко у Господа милость и многое у Него избавление: / и Той избавит Израиля от всех беззаконий его.

Егда вшел еси, / преподобне, / в пустыню Саровскую, / тогда своя воля до конца совлекся, / твердое ко всем послушание показал еси, / досады бо и безчестия претерпел еси, радуяся: / ударения и раны / от злых человек приял еси, / о нихже и молился еси, преподобне, / Господеви молися / мир миру даровати // и душам нашим велию милость.

7. Стих: Хвалите господа вси языцы, / похвалите его вси людие.

Днесь ликуют собори верных / в память твою, преподобне Серафиме, / и велегласно вопиют: / ты любви ради Христовы / вся красная мира оставив / и в пустыню Саровскую вселився, / никакоже устрашился еси / невидимых враг борения, / но сия молитвами твоими / яко прах отметал еси. / Темже Господеви молися, // даровати душам нашим мир и велию милость.

Слава, глас 8:

Приидите, верных собори, / похвальными песньми днесь пречуднаго отца прославим / и сие ему возопийм: / преподобне отче Серафиме, / воистинну сподобился еси Божест-

венная жизни,/ прием от Бога венец нетленная славы./ Се-
го ради обитель Саровская тобою хвалится,/ людие же,
зряще честную раку мощей твоих и чудеса твоя бываемая
славят/ Прославляющаго тя Господа:/ Емуже молися, пре-
подобне,// даровати душам нашим мир и велию милость.

И ныне, Богородичен Догматик, глас тойже:

Царь Небесный/ за человеколюбие на земли явися,/ и с че-
ловеки поживе,/ от Девы бо Чистыя плоть приемый/ и из
Нея прошедый с восприятием./ Един есть Сын, сугуб есте-
ством,/ но не Ипостасию./ Темже совершенна Того Бога/ и
совершенна Человека воистину проповедающе,/ испо-
ведуем Христа Бога нашего:/ Егоже моли, Мати Безне-
вестная,// помиловатися душам нашим.

Посем Свете Тихий:

Вход. Прокимен дне и чтения три.

Сподоби Господи

Сподоби, Господи, в вечер сей без греха сохранитися нам./
Благословен еси, Господи, Боже отец наших,/ и хвально и
прославлено имя Твое во веки. Аминь.

Буди, Господи, милость Твоя на нас, якоже уповахом на
Тя./ Благословен еси, Господи, научи мя оправданием
Твоим./ Благословен еси, Владыко, вразуми мя оправ-
данием Твоим./ Благословен еси, Святыи, просвети мя оп-
равдании Твоими.

Господи, милость Твоя во век, дел руку Твоею не презри./
Тебе подобает хвала, Тебе подобает пение,/ Тебе слава по-
добает, Отцу и Сыну и Святому Духу,// ныне и присно и во
веки веков, аминь.

На литии

Стихира храма.

И преподобнаго, глас 1:

Кíими похва́льными венцы́/ венчаим подвижника великаго, преподобнаго Серафíма?/ То́й бо, яко наставник до́брый,/ в твердости веры и добродéтели явíся,/ Богодохновéнными учении и равноáнгельным житиём/ приходящия к нему науча́я./ Тёмже вопиём ему́:/ молися, преподо́бне, Христу Бо́гу,/ Правосла́вную веру утверди́ти// и душам нашим спасти́ся.

Приидите, инок множества, днесь преподобнаго благочестно восхвалим, истиннаго ученика Спасова, мирскую прелесть поправшаго, ярем Христов на рамо взявшаго и полки бесов посрамившаго. К немуже возопиим сице: не забуди нас, отче Серафиме, восхваляющих и чтущих святую память твою.

Светлая и Божественная память твоя, преподобне Серафиме, удиви всех, яко безплотен бо, во плоти враги невидимыя посрамил еси, вся же страна Тамбовская и святая обитель Саровская, имущи твои святыя мощи, хвалится, сими бо здравие всем, с верою притекающим подается. Темже, просветившеся тобою, вопием ти, преподобне: моли спасимся душам нашим.

Слава, глас 5:

Радуйся днесь, вся Росси́йская землё,/ и святая обитель Саровская, весели́ся./ Вёрных же множества, стéкшеся днёсь,/ просла́вим преподобнаго отца, пастыря и учи́теля,/ Богомудраго наставника заблúждшим,/ скóраго всех болящих цели́теля,/ Росси́йския земли великое украше́ние,/

егоже похваляюще, сице рцём:// преподобне Серафиме, спаси нас моли́твами твои́ми.

И ныне, Богородичен, глас тойже:

Храм и Дверь еси́,/ Пала́та и Престо́л Царёв,/ Де́во Всечестна́я,/ Ею́же Изба́витель мой, Христо́с Госпо́дь,/ во тьме спя́щим яви́ся,/ Со́лнце Сый пра́вды,/ просвети́ти хотя́, яже созда́ по о́бразу Своему́ руко́ю Своёю./ Те́мже, Всепета́я,/ я́ко Ма́терне дерзнове́ние к Нему́ стяжа́вшая,/ непреста́нно моли́// спасти́ся душа́м на́шим.

НА СТИХОВНЕ

Стихиры, глас 5.

Подобен: Радуйся, Живоносный Кресте:

Радуйся, Ангелом собеседниче,/ преподобне Серафиме,/ благочестно бо на земли́ пожив,/ многи, приходящия к тебе, страху Господню поучал еси./ Благодатию Пресвятаго Духа озаряемь,/ зрел еси будущая, яко настоящая,/ и умиления и радости многи скорбящия душею исполнял еси./ Темже молим ти ся:// молися Господеви о чту́щих тя.

Стих: Честна пред Господем/ смерть преподобных Его.

Радуйся, заблуждших учителю предивный,/ Христа Господа во храме со Архангелы и Ангелы видети сподобивыйся./ И ныне, преподобне,/ на Небесех Того зрения выну наслаждаяся,// молися о нас, верою творящих память твою.

Стих: Блажен муж, бояйся Господа,/ в заповедех Его восхощет зело.

Радуйся, преподобне Серафиме,/ всем бо хранити истинную веру Христову заповедал еси,/ и Вышняго жития вож-

делев,/ богатство возненавидел еси:/ ныне же неизреченную красоту Небесную зриши/ и сладкаго пения Ангельскаго наслаждаешься.// Темже молися Господеви даровати нам мир и велию милость.

«Слава» – глас 6:

Преподобне отче Серафиме,/ кто исповестъ труды твоя и болезни?/ Или кий язык изречет жестокое пустынное твоё житиё,/ бдение же и пощение,/ еще же в затворе пребывание,/ устен безмолвие и моление непрестанное?/ Воистинну явился еси постником украшение,/ молитвенник к Богу непостыдный./ Темже к тебе вопием:/ радуйся, в бедах и скорбех великое утешение/ и теплый всем предстателю.// Молися, преподобне, спаси́ся душам нашим.

«И ныне» – Богородичен, глас тойже:

Творец и Избавитель мой, Пречистая,/ Христос Господь из Твоих ложесн прошед,/ в мя Оболкийся,/ первые клятвы Адама свободи./ Темже Ти, Всечистая,/ яко Божии Матери же и Деве,/ воистинну вопиём немолчно:/ радуйся Ангельски, радуйся, Владычице,/ Предстательство и Покрове,// и Спасение душ наших.